

Allannguutissatut siunnersuut

uunga

**Uunga siunnersuut: Raajanut akitsuutit pillugit Inatsisartut inatsisaata allanngortinneqarneranik Inatsisartut inatsisat nr. xx, xx 2013-imeersoq**

Aappassaaneerpeqarnissaanut Naalakkersuisunit saqqummiunneqartoq.

**§ 1-imut**

**1.** Inatsisissatut siunnersuummi nr. 3 ima oqaasertaqassaaq:

”**3.** § 4, imm. 4, ima oqaasertaqassaaq:

”*Imm. 4.* Aallaavissaq 256,2500-iuppat, tassa tunisinermi akip agguaqatigiissillugu kiilumut 24,60 kr.-ip nalingatut, taassumangaluunniit angineruppat, taava akitsuut anginerulerani 15 procentius-saaq.””

Siunnersuummut oqaaseqaatit

### **Oqaaseqaatit nalinginnaasut**

Inatsisissatut siunnersuutip siullermeerneqareernerata kingorna Aalisarnermut, Piniarnermut Nunalerinermullu Naalakkersuisoqarfik aamma Aningaasaqarnermut Nunamullu Namminermut Naalakkersuisoqarfik inatsisissatut siunnersuut manna kiisalu inuussutissarsiutillit matumunnga eqqasuutigisaasa ilaat pillugit Kalaallit Nunaanni Sulisitsisut Peqatigiiffiannik oqaloqatiginnilluarsimapput. Illuatungeriit allannguutissatut siunnersuut una aningaasatigullu kingunerisassai pillugit nalilersuinerit isumaqatigiissutigaat.

Inuussutissarsiutillit siunissami aningaasatigut atugassarititassatigut eqqasuutaasa ilaat inatsisissatut siunnersuummi aaqqineqarput. Tamanna pivoq akitsuutip annerpaaffissaata 15 procentinut apparinneqarneratigut. Allanguineq inatsisissatut siunnersuutip aningaasatigut kingunerisassaanik naliinermut allanguinissamut tunngavissiiingilaq. Raajat akii kiilumut 24,60 kr.-init qaffasinnerulerpata akitsuut 15 procentiunnassaaq. Taama pisoqartillugu Landskarsip isertitassai malittarisassat atuuttut naapertorlugit qaffannaviangillat.

Inuussutissarsiutillit atugarisaasa ataatsimoortumik naliliiffiginissaat siunertaralugu inuussutissarsiutillit oqaloqatigineqartarnerat ingerlateqqinneqassasoq isumaqatigiissutigineqarpoq. Oqaloqatigiittarnerit aalisarnerup iluani pisuussutinit iluanaarutit akileraarusersorneqartarnerat pillugit inatsisitigut suliniuteqarnernut kiisalu aalisarnermut inatsisip iluarsartuussiffigineqarnissaanut pilersaarummut ilanngullugit sammineqarumaarput.

### **Aalajangersakkanut ataasiakkaanut oqaaseqaatit**

*Nr. 1-imut*

Siunnersuutigineqarpoq akitsuutip annerpaaffissaa 15 procentimut nikittussaajunnaarlugu inissinneqartassasoq tunisinermi aki agguaqatigiissillugu 24,60 kr.-inngoraangat.